



Nastavak akcije "Ringišpil" na širem području BiH

JUČER UHAPŠENO 15 OSOBA

Pripadnici Agencije za istrage i zaštitu (SIPA) jučer su u nastavku akcije „Ringišpil“ na širem području BiH uhapsili 15 osoba osumnjičenih za organizirani kriminal u vezi sa poreskom utajom ili prevarom.

U prostorije SIPA-e jučer je pozvan veći broj osoba, od kojih je 15 uhapšeno, a pretresom objekata na više lokacija na području Visokog, Pala, Istočne

Ilidže i Ljubuškog pronađeno je i privremeno oduzeto oružje, određena dokumentacija, skupocjena vozila čija je ukupna vrijednost veća od milion KM, kao i drugi predmeti koji mogu poslužiti kao dokazi, saopćeno je iz SIPA-e.

Kriminalistička obrada uhapšenih još traje, a o njihovom daljem statusu će odlučiti postupajući tužilac Tužilaštva BiH.

Na području Kiseljaka u srijedu je pretreseno pet lokacija i uhapšene su dvije osobe osumnjičene za zloupotrebu osiguranja, prevaru u privrednom poslovanju, falsificiranje ili uništavanje poslovnih ili trgovačkih knjiga ili isprava, davanje lažnog iskaza i pranje novca, čime su za višemilionski iznos oštećeni budžet BiH i druge pravne osobe.

Aktivnosti u okviru akcije „Ringišpil“ provode se prema naredbama Suda BiH i Tužilaštva BiH, a u saradnji sa službenicima Uprave za indirektno oporezivanje Bosne i Hercegovine, MUP-om RS-a, te ministarstvima unutrašnjih poslova Srednjobosanskog, Zapadnohercegovačkog i Zeničko-dobojskog kantona, javila je Srna.